

LU POPULU MALATU

Fermati menti mia, un parlari, penza,
Scusati si vinni a casu stranu,
Signuri vi fazzu a tutti rivirenza.

Iò vegnu di li celi cchiù celestri
D'un tempiu fabbricatu senza mastri,
Nun c'è porti, purtuna, né finestri,
Nè pili, né pilacciuna, né pilastri,
Nè dotti, né scenziati, né maestri,
Nè gaddi, né gaddini, né puddastri,
Sulu c'era iò cu st'abiteddu,
Dicitimi sugnu beddu o un sugnu beddu?

Ora chi ccà sugnu arrivatu,
Nta stu paisi nobili e pulitu,
Lu populu truvai tuttu malatu,
Hannu lu stomacu fradiciu e purritu.
C'è cu campa bbonu ed è ntrunatu,
C'è cu è sempri afflittu, striminzitu,
Viniti malati chi nun stati beni,
Visitamu stu mali di dumni veni.

Amicu nun hai panza malata,
Tu vai a travagghiari la campagna,
Hai zappatu e dopu na iurnata,
Ci voli un chilu e mezzu di lasagna

E pi darici l'assenzu e ben nsucata,
Ci voli un piattu quantu na muntagna;
Tu stu piattu nun l'hai, resti afflittu,
Ti resta la malatìa di lu pitittu.

Chistu havi la stessa malatìa
Si viri cun ci havi nenti nta la panza.
Quant'havi cun mangi tu, dimmillu a mia?
Mancu vai parlannu cu crianza!
Nta tanti famigghi c'è n'epidemià,
Famigghi d'operai la maggiuranza;
Picchè si visitati l'impiati
Stannu bbeni, campanu biati!

Pi chistu, ci voli carni e maccarruni,
La nirvatura l'havi tutta sana,
Fici lu cantieri a lu Cumuni,
Nto n'annu ci travagghiau na simana.
E quannu di la summa fu patruni,
Pi sustanza s'accattau na milingiana,
Chi la sustanza, pi l'operai e li ggintuzzi,
L'hannu li milingiani e li cucuzzi!

E supputamu chista malatìa,
Si sapi di dunnì veni lu difettu,
È l'epuca di cu mancia e cu talìa
E di cu s'arrancia a sunari l'urganettu.
Nun basta bravura, mancu giuimitrìa,
Tecnica, cultura né ntillettu,
È comu lu iocu di la zichinetta,
Lu bancu nni spogghia a tutti la sacchetta!

Fineru li festi di Cannalivari,
Si ritira lu mastro cu la puisìa,
Si erruri c'esti m'aviti a scusari,
Un sugnu dottu di filosofia.
Amici e nimici chi stati ad ascultari,
Sin'anchi a chiddi echiù dotti di mia,
Si c'è qualcunu chi nun arristau cuntenti,
L'annu chi veni ritornu novamenti.

MUNNU DI FESTA

Iò sugnu lu dutturi ammintuatu,
O cari amici si vi ricurdati,
Chiddu chi vinni l'annu passatu,
A visitari tutti li malati.
C'è qualchi malateddu cchiù gravatu
Di chiddi scarsuliddi abbannunati,
Chi fà la cura di vitamini strani,
Di cucuzzi, cipuddi e milinciani.

Malateddi comu vi la passati
Cu sta granni cura chi faciti
Di cipuddi e cucuzzi ammarinati?
Vi raccumannu ogghiu un ci mittiti,
Comu l'agneddi facitili nfurnati.
La linia perfetta mantiniti,
Cu l'ogghiu si tenta d'ingrassari,
Finisci un si putiri cchiù calari!

Viditi la scienza quantu è prugridita?
Quantu medici chi vannu a lu cungrèssu?
S'incontra dda testa cchiù struita,
Si marcia sempri versu lu prugressu.
Iò passu e ripassu la mè vita,
Mi giru e rigiru l'universu,
Nta lu cungrèssu sapiti chi si dici?
Li medici di la pasta sù nimici!

Di lu cungressu diagnusi cintrali,
Tutti li medici hannu dilibiratu:
Un piattu di pasta chinu vi fà mali,
Cunzigghianu di farlu cchiù smizzatu.
Tutti sti farinaci un sù vitali,
Lu cori travagghia cchiù affannatu
E lu malatu li cucuzzi l'accumpagna
Cu qualeddu e giritedda di campagna.

Livannuci la pasta fà piaciri,
Li cunti vennu cchiù facilitati,
O canteri varagnati milli liri,
Un cucinannu la pasta v'abbuffati,
L'operai vannu a prugridiri,
A l'usu amiricanu sù trattati,
Aspittannu lu prugressu e paraddisu
Dunni chi nuddu sapi unni stà misu!

Viditi a chistu quantu è nciafardatu?
Mancia sempri carni e maccarruni,
Chi stommacu chi avi cumminatu!
Pari un ponti mmezzu lu stratuni.
Quannu parla ci manca lu ciatu,
La nanfara ci apporta stu panzuni,
Avi la panza chi ci stà scattannu,
Mancia e bivi sempri, tuttu l'annu.

L'autru iornu lu vitti o ristoranti,
Manciava carnazza e maccarruni,
Rusbiffi leggeri e cchiù cruccanti,
Nta tavula cci avia mezzu capuni,

Lu provulu duci, lu piccanti,
Sasizza, fillata, sasizzuni
E poi un vi ricu chiddu chi vivìa
Chi saziu mai si virìa!

Si vinni nni mia a visitari,
Mi dissi chi si senti malamenti.
Ci dissi: Figghiu meu, u troppu mangiari,
Lu cori mmezzu stu grassu nun si senti.
Si mpiatu? Vai a travagghiari?
Mi dissi: Manciu, vivu e fazzu nenti!
Mangia e vivi sempri nquantità,
Chistu lu paraddisu l'avi ccà!

A la matina si susi matinu,
Mi dissi si nni và mmezzu la chiazza,
Si vesti pulitu comu un signurinu,
Dda qualchi cosa la ntrallazza.
Avi na machina quantu un trininu,
Tutta tendi, senza na spilazza
E basta chi manca na rancata,
Picciuli nni porta na palata!

Iò stesi America, Argentina,
Visitai li paisi cchiù luntanu,
Visitai lu Giappuni, anchi la Cina,
Lu munnu l'haju giratu tuttu nsanu.
L'Italia di malati è tutta china,
A Napuli soccu cc'è, anchi a Milanu.
Ora vi parlu di la clinica cintrali,
Chi c'esti a Roma, a capitali.

Un malatu chi discinni di li mori,
Ha fattu sempri liti pi manciari,
Omu ntelligenti e di furori,
Omu di mezza età, v`a a biancari,
Omu di talentu, omu di cori,
Stuffu, la clinica vulia lassari,
Poi, pinsannu soru soru,
Stannu senza manciari allura moru!

Passaru jorna, arr`e si sistimau!
Lassu a iddu e pigghiu un profissuri,
Mischinu lu ciriveddu s`ammalau
Avia la testa china di rumuri,
Un ghiornu a mezzornu ci spuntau
Unu di li soi ch`esti pasturi
E nta na tinarella mezzu matta
Chistu mangia sempri a scatta scatta!

Puru c`è di bonu nta sta casa
Una tina di meli senza chiusa,
Un cristianeddu cu la testa rasa,
Zammatt`a cu li manu a la rinfusa.
Chistu America ci havi a so za Masa
Ci manna mangiari a cascia chiusa,
Nta dda tina ne ni mangia ne ni talia
Lu preti penza e dici : è tutta mia!

Chi granni clinica, chi lucali raru,
Quantu gran mangiari a munzidduni,
Dda dintra c`esti puru un Palummaru,
C`è puru un Colombu e un Picciuni,

Hannu un cannizzu paru paru
Chinu di frummentu e di granuni
E dopo sti cannizzi beddi chini
Nto n'angulu ci stà puru lu mangimi!

Tutti sti malati riuniti
Sunnu un migghiaru ben cuntati,
Dda dintra, cucuzzeddi nun nni viriti,
C'è sempri polli e abbacchi nfurnati.
L'annu scorsu pi mangiari ci fù liti,
Lu cunsigghiu aumintau nautra mitati.
Cu tuttu stu mangiari e stu gran piattu,
Dda dintra stramera fà, puru lu Gattu!

Malateddi di lu meridiuni,
Sciglitivillu bonu lu spitali,
Lassati iri lu settendriuni,
Scigliti la clinica centrali.
Ci fù lu zu Cicciu lu zu nToni,
Di tannu nun si sentinu cchiù mali,
Cu si va cura a Roma è furtunatu
Nesci nsaluti e un cadì cchiù malatu!

Stu poviru e afflittu diplomatu
Havi li aggiuna, un pò mangiari,
Quantu gran ricetti ca pruvatu,
Di stu mali nun si pò allibbittari,
È pallidu, afflittu, arrapacchiatu.
Sta vota grassu ta fari addivintari!
Pigghiate sta midicina, ti cunsigghiu:
Ci voli vitamini di Cunigghiu!

Vitadini di ddu gran Cunigghiu,
Mmezzu l'arvulazzi d'abetu,
Avant'eri appi un pocu di cattigghiu,
Ora mangia e vivi e si sta quetu.
Malateddu iò ti lu cunsigghiu,
Sta clinica guarisci a lu cumpletu,
Di cunigghiedda c'è cu scappa e cu fui,
Lu grossu di sta tana un nesci cchiui!

Purtatilu a San Marcu ch'è elevatu,
Oppuru direttamenti a Giacaluni,
Oppuru a Napuli ch'è cchiù sistimatu,
Aggregalu a qualcunu ch'è mangiuni;
Estrattu di pollu ch'è ludatu,
Copia a dd'aciddazzu, lu facuni
E pi mangiari megghiu t'indirizzu
Nta dda gran muntagna unn'è lu Pizzu!

Nta stu Pizzu ci trovi lu Facuni,
Ci trovi lu Cunigghiu, gran mangiuni,
Hannu sempri mangiari a munzidduni,
Comu lu Colombu e lu Picciuni,
C'è puru lu Gattu e lu Liuni.
Cari amici si acultati un pò,
Ora vi parlu di un granni zoò.

Nta stu zoò c'è armali d'ogni razza,
Armali rapaci e dammaggiusi,
Ci nn'è cu dda sorti di vuccazza,
Cu scagghiuna grossi e pudirusi.

Dda dintra succeri u strazza strazza,
Cu la giungla di l'Africa cunfusi,
Ma nun virennu ne palmi, ne banani,
Subitu capivi, sù 'taliani!

Pi st'armalazzi grossi e senza frenu
Ci voli mangiari a largasìa.
L'avemu niautri tuttu stu tirrenu,
Quantu lu grossu mangia e si stravià?
Chi su scecchi, chi ci voli pagghia e fenu!
Lu sceccu cu poca pagghia si sazìa!
St'armali vonnu un vistiolu sanu,
Comu havi a fari stu populu Italianu!

Poviri pecuri e vistiola sani,
Niautri c'avemu tutta sta buvina,
Mannatilu stu zoò mmezzu l'Indiani,
Li vistiola dda su cosa divina!
Nun hannu né canvughia, né custani,
Dda stati sempri cu la bozza china;
Mannatili nn'India, grossi e picciriddi,
Lassati tranquilli sti quattru picuriddi!